



*Kamis, 01 Juli 2021*

**Ogen: 2 Kronika 15:7**



**Tetap Megegeh**



**L**it upah megenggeng. Tapi la nterem kalak ngasup megenggeng i bas hal-hal si idalanina. Menukah bosan tempa lanai lit ulih si ialokenna. Terdauhen, jungut-jungut, ncubaken sideban janah lit si ngadi rusaha i bas si idahikenna e. Enda la saja i bas anak-anakta tapi i bas kalak dewasa pe megati jadi si bage rupa.

Bulan si lepas anak-anakta enggo ndungi pendidikenna i bas tahun ajaren si lit. Deba naik kelas, deba tamat dengen mengketi sekolah mbaru: SD, SMP, SMA ras kuliah. I bas si e nterem anak-anakta banci bengket ku sekolah si nisurakenna tapi lit ka nge la seh sura-surana, i bas sie ia merasa gagal. Enggo erjuang ras rusaha sedekah enda tapi la dat. Erbage-bage sikap anak-anakta ngalaken si e. Banci saja lit si ndarami peluang sideban tapi lit ka nge si merasa putus asa. Lanai atena ndarat rumah nari, mela iakapna ngidah teman-temanna si seh sura-surana.

I bas situasi sibagenda mbelin kal peranta selaku nande, orangtua, ndampingi ras mpetetap ukur anak-anakta e. Amin kita pe banci nge kecewa kerna la seh sura-sura anakta. Tapi selaku nande kita arus megegeh, ula ateta aru, semangat janah si temani anak-anakta. Pengalamen ras kengasupenta ngalaken situasi e lit tapi anak-anakta banci langa ngasup. Si apuli ia, si bere pendapat ras cara rukur si melala. Adi tutus ia, tetap semangat pasti lit peluang si lebih mehuli. Emaka arus si tatap arah mata kinitekenta.

Bagenda me Asaria nehken kata man bangsa Juda ras raja Asa, kerna kai sinandangi jadi dengen kuga cara ngalaken si e kerina. Ipetatapna ukur raja gelah tetap megegeh ras la eraru ate i bas ndahiken dahin si mehuli e. Pasti erbuah i bas paksana. Bage me Asaria mpetetap ukur raja i bas situasina.